



Une sere di istât dal 1982. Al jere te cjamare dai

siei. Al veve viert il televisôr narançon, un Telefunken b/n. Mame Rai e trasmeteve “Milano Suono”. Veju li, a sunâ intun parc di Milan, i **Echo and The Bunnymen, di Liverpool**, i fîs suture dai Doors, i nevôts di David Bowie... Lui al veve scuvier il non di chel complès su Ciao 2001, un gjornalut di musiche par zovins. Suns misteriôs, une vôs suture, chê dal cjantant che al sune ancje la ghitare ritmiche. Ce difference de musiche pandude normalmentri su lis radios FM! Chês a son cjançonetis. Echo a fasin alc di plui profont, al è clâr.

Viers la fin dal concerti al rive il papà. Al è incazât cun so fi. “Ce stâtu simpri siarât in cjase? Parcè no vâtu ator cui amîs?” i berle e al sbat la puarte tornant vie. Il fi, plen di rabie, al cjape une cjadree stîl Impero e le sbat cuintri l’armaron.

Ce rispuindi? Parcè fâ la ator cun chê int ignorante? Amîs? Ma se i vevin pissât tal serbatori dal motorin... ma se lu lassavin simpri indaûr parcè che a vevin i motôrs trucâts... ma se lu coionavin parcè che nol veve la morose... E dopo a fasevin ancje di piês... a metevin modons tal mieç des stradis di gnot, a spacavin i cartei stradâi e, platâts tes blavis, a fasevin i gavetons ai puars vecjos che a passavin in biciclete. No. Papà nol pues capî. No si pues lâ ator cun chê intate; il fi al à di cjapâ une altre strade... al à miôr sierâsi dentri a sintî musiche...

24 Avost 2018. Pordenon... Echo & The Bunnymen... Une altre pagjine blancje di jemplâ... tante int di tornâ a cjatâ, int in sintonie... tante buine musiche di scoltâ... Pecjât di no podê spiegâ al papà che il fi al veve fat ben ta chê sere di Istât di tancj agns prime a restâ sierât

in cjase...

di Checo Tam